

ГЕНИЙ ГОРЧАКОВ

РАСДОР ГРЕЗДСА
ВАРУК



ГЕНИЙ ГОРЧАКОВ

*РАСДОР ГРЕЗДСА
ВАРУК*

Повесьт



Сыктывкар
Коми небӧг лэдзанін
2006

ББК 84(2Рос=Ком)

Г70

Серпасалис А.В.Мошев

Горчаков Г.Д.

Г70 Расдор грездса Варук: Повесьт. — Сыктывкар: Коми небөг лэдзанін, 2006. — 48 л.б.

ISBN 5-7555-0871-2

Гений Горчаковлөн повесьтыс артмис ичөтик грездын олысь квайт арёса Варук йылысь нейджыд висьтыясысь. Кызди нывка тодмасьё сійёс кытшалысь олёмнас, кызди велөдчө мирён-ладён овны мам-батыскөд да тшөтшъяяскөд, кызди сөвмё сылөн вежө-рыс — тодмаланныд тайё небөгсө лыддигөн. Варук, гашкө, неуна асныра, но сэк жө вермё сулавны ас кыв вылас, збыльмөдны мөвпяссө да көсиймъяссө.

Небөгсө артыштөма посни войтырлы, гижөма на кодь жө нывка йылысь да налы гөгөрвоана кывйөн.

ББК 84(2Рос=Ком)

ISBN 5-7555-0871-2

© Горчаков Г.Д., 2006

© Мошев А.В., оформление, 2006

© Коми книжное издательство, 2006

Гажа!.. Ок и мича да гажа ичөтик Расдор грездыс! Сулалө кыддза-пипуа рас дорын, сиктсьыс да мир туйсьыс бокин, гөра-көдза муяссайса чук йылын.

А грездыс збыль сөстөм да гажа. Весиг зэра поводдя дырйи эз вөвлы няйт. Уличас пыр вежөдіс дженъыдик туруна эжа, а керкаяс дорас сулалісны вылө гогнитөм юръяса пельсыяс да льөмъяс, шарөдчисны джуджыд сэтөр да өмидз кустьяс, жов пуяс.

И оліс тайө ичөтик да мича грездас Варук нима нывка.

Варуклөн семья

Варук — визув, инас өшйивтөм мичаник нывка. Шобді идзас кодь юрсиыс сылөн гартчис зарни чикыльясөн. Муртса төдчысь берина чужөм шөрас чурвидзис, быттьө нимъясис, вывланьыс чангыльтчыштөм ныр. Кызкодь паръяса вомыс пыр вөлі неуна калькалыштөма, да и енэж кодь лөз синъясыс гырысьөсь, быттьө мыйыськө чуймыштөмаөсь.

Бать-мамыс Варуклөн лун-лун уджалісны: батыс колхозын механикаліс, а мамыс сельпо кантораын зілис. И лунъяссө Варук коллявліс Ёвдя пөчыслөн дөзьөр улын: ичөтик грездад сад-яслиыд эз вөв, а новлөдлыны сиктөдз вель ылын — кык километра сайө. Да и мыйла, пөчыс кө вермөдчис на.

Ёвдя пөч садьмыліс водз да вөчліс унджык гортса удж-могсө: вердіс-сөөдіс порсьсө да ыжъяссө, лысьтысьсөм бөрас вөтлывліс скөтсө Расъель шордорса луд вылө, а пиа-моньыслөн удж вылас мунөм бөрын идрасис-пелькөдчис гортас — дозмук мыськис, джодж чышкаліс да мукөдторйөн ноксис.

Варук садьмыліс бөрьяён, мам-батыс мунігөн нин. Мыссьом-пасьтасьом да сёйыштём бөрас аслас пельёсын ворсіс чачаён. А чачаыс сылөн абу этша. Медся мусаён вөліны мича платтьоа кык акань. Идзас рёма юрсиа Ляля да рыжой Валя. Вөліны и Мишка ош да паськыд лапья пеля Кутьё пон, и кузь пеля Тупыльбөж көч.

Кор пөчыс эштөдчыліс идрасян-пелькөдчан уджён, петавліс Варукөд сөстём сынөднас лолыштны да мича-гажа ывланас нимкодьясьыштны.

Гожся шондіа луньясө пөчыс тшөкыда пукавліс керка водзас да шонтіс пөрысь лысьёмсө, а Варук петкөдліс керкасьыс чачаяссө да ворсіс-ноксис наён, либө ризьяліс-котраліс, вөтлысис бобувьяс да юрсигусьяс бөрся.

Төвнас найө ворслісны лым мачён. Варуклөн мачыс лэбліс бокиті, но пөчыс, нывкасө гажөдөм могысь, унаысь ачыс мач улас шедөдчыліс. Öвдя пөчыс ислөдліс Варукөс и даддьөн грездсайса чой йывсянь. Водзджыксө нывка полыштліс да синсө куньліс, а сэсся збоймис да ышмис, и дась вөлі лэбыштны чой горулыс и өтнасөн, но пөчыс эз лэдз.

Варук сөвмө-быдмө

Радейтіс пөчыс ветлывны суседьяс, ас тшөтшьяяс ордө, да чай юигмоз варовитыштны, казтыштны томдырся олөм-вылөмсө и өнія төжд-могөн юксьыштны. Варук ветлывліс пөчыскөд да сюся кывзіс олөма пөль-пөчлысь сёрнисө. А кор найө шыөдчылісны сы дорө, Варук окотапырысь висьтасис и ачыс тшөтш юасис. Корсюрө суседьясыс волывлісны на ордө да тшөтш чуркисны-юисны чай, варовитісны.

Вочасөн нывка кутіс көдзавны чачаяс дінө. И көть ворсліс на наён, пыр унджык и унджык гартчис пөчыс дорын. Видзөдіс, кыз-мый вөчө пөчыс, сійөс жө и аслыс окота. Петас пөч песла — Варук сы бөрся. Көть вөсньыдик, дзав кодь чурка, да пыртас. Заводитас пөчыс дозмук мыськыны — Варук тшөтш



корö ва тыра ыджыд бекар тасьтi-пань мыськыны. А пöчыс некор оз öлöд внучкасö, оз шу, дзоля на да водз на пö тайöн ноксыны. Пыр нин ошкыштас нывкасö:

— Но и молодец жö нин тэ, менам мусаöй!.. Прамöй молодец!.. Тэысь, тыдалö, зэв прамöй, уджач морт быдмас.

Пöчыс кө петавлис град йöрас весавны ёг турунысь град выв пуктас, Варуклы эз жö пукавсьы гортас. Сийö вöтчылис пöчыс бöрся да тшöтш суйсьылис весавны градсö. Юасис, көни ёг, а көни колана быдтас. Сöмын нывка öдийö мудзлис, да пöчыс ыстылис сийöс межа вылас шойччыштны. Но нывкалы регыд лолi гажтöм, да сийö чукöстлис дiнас пöчсö. Тшöтш пö шойччышт, да öддзылис быдторсö юасыны:

— А тайö кутшöм турун? А тайö мый сэтшöмысь?.. Мыйла öти бобувьяс еджыдöсь, а мукöдыс уна рöмаöсь?.. Мыйла зэрö?.. Мыйла көдздöдлö да усьö лым?..

Ставсö нывкалы окота тöдны. И Öвдялы, кыз сяммис да кужис, лолi висьтавны. Көть мукöддырйи манитчылис уджнас.

Ёна кажитчисны нывкалы дзоридзьяс. Керка мышкас, град йöрсö кытшалысь межаясас быдмис уна дзоридз. А Расьель шор дорö лэччан пöкатыс веравлис став рöмнас.

Медся ёна Варук радейтiс катшасиньяс да лöз дзоридз бордьяса мылöдвужьяс. Нетшыштас кымынöскö, чабыртас ичöтик кабырас, бергöдлö быд ногыс — нимкодясьö. Сэссия и пöчыслы на мыччöдлас-ошйысяс. А мичаник да мусаник понжын-нянъяссö матöдлис пель дiнас да чайтсьылис сылы, мый збыльысь кылö тоньгöм шыыс. Быттьö пö дзик жö нин Сюрук мöсныслөн жыннан моз тоньгö.

Варук да радио

Кыдзкö тулыснас, лым сывтöдзыс на, Расдорö кык мужичöй трактора доддьöн вайисны керьяс да косталöмөн разöдiсны улич кузяыс. Варук буретш ывлаын вöли. Аддзис, мый воис трактор, мужичöйясыд улич шöрас лэдзисны кузькер, да котöртiс на дорö, горöдiс:

- Мыйла нө тайос татчө вайинныд? Мешайтчыны өд модас. Олөмаджык мужичөйыс вочавидзис:
- Сійө оз кут мешайтчыны. Регыд сійөс сув...
- Нывка пыр и торкис:
- Татөн ме даддьөн ислала. Аддзанныд чойсө? Нуой бөр.
- Но?.. Тэныд нө радиоыс оз ков?
- Кутшөм радиво?.. Мый сійөн вөчөны?
- Радионас?.. Радиосө кывзöны.
- Менам и сідз эм, кодос кывзыны.
- А кодос нө, эськө, тэ кывзан?
- Мамос да батьос... Пөчос тшөтш и.
- Тайө зэв бур, мый тэ кывзан найос. Сөмын өд радиосө мөдджык мөгөн кывзöны. Сійө өд...
- Ме сэсса некодос кывзыны ог көсйы. Нуой бөр...
- Радиоыс өд сыланкывъяс сьылө да мойдъяс мойдө.
- Но и мый?.. Менам пөчө ачыс сьылө и мойдө. А иславнысө мем некөн лоө.
- Радиоыс өд мөдджык сыланкывъяс сьылө и мөд пөлос мойдъяс мойдө. Пөчылдөн серти лөсьыдджыкъясөс.
- Менам пөчөысь мичаджыка некод оз сьыв... Ни оз мойд... Сійө и менө тшөтш велөдө сьывнысө. Йөктыны и.
- Но?.. — чуймыштісны быттьө мужичөйяс. — Пөчылд тай тэнад молодец...
- Дерт, молодец.
- А кызди нө сійөс шуөны?
- Кызди шуөны?.. Пөчөн, дерт... Висьтала тай со.
- А-а... А батьтө кызди шуөны?
- Папөн...
- А мамтө, дерт нин, мамөн... Налөн нө нимыс абу али мый?
- Мыйла абу?.. Эм... Налөн ставыс эм.
- Тайө бур, мый налөн ставыс эм. А пөчылд нө батьтө кызди шуө? Либө мамтө?.. Менө тай со Трөпимөн шуөны. А найос кызди?

— Найос?.. Пöchö папös Öльöксейөн чуксавлö, а мамös — Тоняөн.

— А тэнö кыдзи шуöны? Тэнад нимыд кыдз?

— Варук.

— Со и тöдмасим. Но, мый кутам вöчны? Бөр нуам сюръясö али, гашкö, колям? Бокöджык вештыштам? Муыс сълöм бöрын найös сувтöдасны, нюжöдасны сутугаяс, и тiян лоас радио. Сiйö öд ёна лöсьыда сълö-мойдö.

Варук недыр кeжлö думыштчылис да шуис:

— Вештанныд кö — мед. Гашкö, сiйö и збыль ёна лöсьыда сълö-мойдö.

— Лöсьыда, лöсьыда, — шуисны мужичöйяс, вештисны сюръясö да мунисны.

Лым сълöм бöрас сюръяссö сувтöдисны, керка пытшкöдзыс нюжöдисны сутуга, но некод эз мойд и эз сыв. Варук дöзмöпырысь элясис:

— Со öд кыдзи пöръясисны. Шуисны, мый сутуга кузяыс радиво воас, сывны да мойдны пондас, а некод эз и во. Некод оз мойд, ни оз сыв.

Мамыс висьталис, мый аски сельпоас вузаласны репродукторъяс, сiйö ньöбас да ваяс гортас. И репродукторыс кутас сывны да мойдны.

Мöд луннас мамыс збыльысь вайис нейджыд көрöб-куд, сэтчö көв пысалöма, а көв помас кык йыла тор. Вилкаөн шуисны. Сiйö вилкасö сутшкисны стенса розеткаö, и кудъяс кодкö збыль кутис сывны.

Рытивбыд радио сёрнитис да сълис. Асывнас сiдз жö. Варуклы окота лои тöдны, кыдзи сэтшöм ичöтик кудйö сымда йöзыс тöрöны? Батыс, эськö, висьталис, мый сълысь-сёрнитысьясыс ылынöсь, а гөлöсныс налөн сутуга кузяыс воö. Но Варук эз эскы. Юрас бергалис мöвп: вöсьтлыны кудсö, видзöдлыны, кодъяс сэн сълöны-висьтасьöны? Мöд луннас, пöчыс кытчöкö петис да, Варук, дыр майшасьтөг, судзöдис

стенсьыс радио кудсö да кутіс корсьысьны, кызди сійöс
восьтыны.

Дыр-ö-регыд, но восьтіс сайса вевтсö, а пытшсьыс некодöс
эз аддзы. Тайöн нывка эз бурась, кутіс водзö гурйысьны:
орйöдліс кутшöмкö проводъяс, видліс вештыны бокöджык куд
шöрссьыс кыз көртысь гöгрöстор, пуртöн розьйöдліс да чашкөдіс
сьöд картон, но сідз нинöм эз и аддзы.

Кор кыліс локтысь пöчыслысь кок шысö, тэрмасьöмөн туп-
кис радио кудлысь вевтсö, бөр öшöдіс стенас да сатшкис вил-
касö розеткаас. Но радиоысь нинöм эз кыв. Ни сёрни, ни
сьылöм.

Варук гөгөрвоис: радиоыс, тыдалö, тшыккис. Да повзьöмөн
кайис паччöрас, саймовтчис. Зэламыштöм вир-яя, кутіс вич-
чысьны, мый лоö водзö, мый пöчыс шуас.

Но Öвдя пöчлөн велавсьöма нин радиотөг овны, да эз и
гөгөрво, мый керкаас чöv-лөнъ.

Кор Варуклөн чеччалысь-пессьысь сьölöмыс неуна личалис,
сійö лэччис паччöрссьыс да петіс ывлаö. Но ворсөм-гажөдчөмыс
эз кыскы. Зуныгырасис лун помсö öтар-мөдарын, а рытланыс,
бать-мамыс воигкежлö, кайис сараяс да дзевбсис турун пиас.

Керкаас пырöм мысьт Тоня пыр жö и чуккөстіс нывсö:

— Варенька!.. Волы ме дінö, видзөдлы, мый ме тэд вайи, —
да кыккис сумкасьыс виль тупли гоз. — Көн нö тэ, Варук?
Волы, мися.

Но Варук эз лок ни эз шыась. Кутісны корсьны, но эз
аддзыны. Көсйисны ывлаö петавны, да буретш воис Öльөксей.

— Но-но, петалöй, корсьöй, — шуис гөтырыслөн висьтасьöм
бöрын. — А ме сэк кості вежся да мысья.

Сöмын на вевъяліс соссö пуджны, кыздз казяліс: радиоыс
чöv олö. Бергөдлыштіс шы горзьөдансö, но весьшөрö. Сэк
Öльөксей восьтіс репродуктор мышсьыс вевтсö да аддзис, мый
кодкө гудйысьöма да ставсö орайöдлöма. Пыр и гөгөрвоис:
нылыслөн киподтуйыс. Сы вöсна и дзевсьöма кытчөкө.

Керкаас бөр пырисны гөтырыс да мамыс, сойбордйөдыс кыскисны пыксысь Варукös. Тоня майшасяна шуис:

— Сарайын турун пиас дзедьсьöма. А мыйла — оз висьтав.

— А ме тöда нин, мыйла, — вочавидзис Öльöксей, нуöдiс нывсö пызан дорас, сувтöдiс пидзös костас да видiс вöчöмторсьыс. Медбöрын чиршöдлыштiс, водзö кө пö колана көлуйсö кутан юасьтöг-висьтасьтöг вөрöдны да тшыкöдны, тасмаала.

А мамыс мыччöдлiс выль туплисö, ог пö сет, бөр нуа лавкаас. Сэссия коньөрös сувтöдiсны горнича пач пельösö. Мыжсö кылысь нывка весиг эз никöстлы да час чöж чöла сулалiс. Весиг пач костас саймовтчылiс.

Аскинас мамыс вайис выль репродуктор. Варук сэссия эз нин гудйысь сэни.

Ловья чачаяс

Ловья ловтö — понтö ли, каньтö ли — Варук ёна радейтлiс. Малавлiс найös, ворслывлiс и. А торья нин сылы кажитчисны лэбачьяс. Аддзывлiс кө öшинюв йöрас жбыркьялысь пышкай-пыстаös, кватитлiс нянь шөрöм да петавлiс ывлаас. Сэн, кильчö помсянныс дзирьяödзыс пöвья пос вылас, чирйылiс сийös. Польшь лэбачьясыд эз на пырысь-пыр уськöдчывны нянь пыриг дорад, видзчысисны. Сöмын кор Варук вешйыштлiс бокö, öти лэбач, разведкаö моз, жбыркнитлiс чирйöм нянь дорас, чатрасьыштлiс öтар-мöдарö да вöлисти мöдлiс кокасьны. Пуяс да потшös вывсянныс кыйöдчысь мукöд пышкай-пыстаыс сьöрсьөн-бöрсьөн тшötш жбыркнитлiсны пос вылас, зiля-зiля öктiсны став чирсö. Гöгралыштлiсны, корсьысян мозыс, да бөр уйкнитлiсны-лэблiсны пу-потшös вылö.

Но Варуклөн кийс сiдзи и нюжöдчылiс көть öтикös да малалыштны. Сийö нöшта пыравлiс гортас выль шөрöмла, бара чирйис. Лэбачьяс волiсны. Нывка, нимкодясиг, видзöдас-видзöдас, сэссия гусьöникөн пондылас матыстчыны, мед кутны öтиös...

Но!.. Вывітджык матыстчөм мысьт лэбач кельöб öтырышйөн лэбзьыліс.

Зэв гажа Варуклы вöвлі, кор öшинювса пельсыяс вылö арнас воліс гөрд морöса пельсыкайяслөн кельöб. Нывка сюся видзöдліс, кызд гөна сорса да крукыля ныра гөсьтьяс азыма кокалісны гөрд пельсь мольяссö. Варук нимкодъысла весиг чиктыліс.

Лым усьöм бöрас öти шойччан лунö Варуклөн батыйс, Öльöксей, пыртіс гортас кык панера пöв, улöс пуклöсысь муртса ыджыдджыкös, некымын рейка да кутіс пилитчыны-тувь-ьясны, мыйкö вöчны. Варук видзöдыштіс, а сэссия юаліс:

— Тэ, пап, мый вöчан?.. Висьтав но, мый?

— Вöча да сэки, гашкö, и ачыд гөгөрвоан, — шуис батыйс.

Медводз сійö панера торсö гөгөрыс дорöсалис да быд пельöсö сувтöдіс весьт кузьта рейка. Бытьö ичөтик сюръяяс артмисны. Сэссия сюръя йывъяссö йитліс жö рейкаясөн. Медбöрын мөд панера торсö пилитіс шöри да, керка выланыс моз, кык пöката вевт вöчис. Артмис ичөтик чом кодъ. Сöмын стентöм, рейкаяс вылын.

— Со мян стрöйбаным и дась, — шуис Öльöксей. — Кызд чайтан? Мый тайö?

— Чача керка. Тані кутасны овны Ляля да Валя.

— Ляля-Валяыд татчö оз тöрны. Тайö лэбач верданін. Рочөн кö — кормушка. Öшöдам льöм пу вылö, тэнад öшинь водзö, кутам петкөдлыны чирйыштöм нянь либö шыдös. Аддзан öд: төвнас муыс ставнас лым улын, лэбачьясыдлы, коньöрьяслы, дзик нинöм оз сюр кокавнысö. Ми вердыштам найös, мед тшыгысла эз кувны. И тэ öшиньöдыд кутан видзöдны да нимкодьясны, а найö, кокасиганыс, тивзыны мөдасны, «аттьö» тэд висьтавны.

Гажыс вöлі Варуклөн, кор кормушка-чомйö кутісны воыны гөрдовруд рöма пышкайяс да вижа-лöза морöса пыстаяс! Быд лун батыйс петкөдліс лэбачьяслы сёян, а Варук видзöдіс, кызди пашкыр гөна ловъя ловъяс тивзісны да кокасисны. И збыль, найö тшöкыда видзöдлывлісны öшиняс, кöні тыдалис нывкалөн гожъялөм шобді идзас рöма юрыс, да збыльысь аттьöалисны сійös.



Варук да Мурзик

Лэбачьяс велалісны да волісны быд асыв. Пуксявлісны пуйс вылё да виччысисны, кор Ёльоксей, удж вылас мунігмоз, мыйкё да петкёдас налы. А Варук, лемасысь синма на, куньтырасиг ляскысьліс ёшинь дорё.

Ўтчыд Варук сулаліс ёшинь дорас, нимкодясис лэбачьяс-нас, а кокас дышпырысь зыртчис Мурзикас, дерт, мыйкё корис нывкалысь. Меліалём ли, чёскыдтор ли.

Мурзик — руд сера пушыд гёна кань. Радейтліс, мед сійёс малалісны. Да и Варуклы кажитчис корсюрё сыкёд ворсыштны. Гудёк мек моз куснялём бумагатор кёрталас сунис помё да дэльёдё Мурзикасё. А Мурзик котралё-вётлысьё бумага бёрсяяс, весиг чечыштавлё, Варук кё лыбёдлас бумагасё вылёджык.

Радейтліс Варук и малавны Мурзикасё. Шылькнитігас каньыс мегыр моз кусыньтліс мышсё. Но мездорё босьтігён Мурзик зільліс мездысьны киясь, пескыльтчыліс да чечыштліс джоджё. Сэсса ньёжйёникён, быттьё тшапитчыштёмён, мунліс нывка дорысь. А ыштыліс кё Варук бёр кутны сійёс, уйкнитліс-пышйыліс, саймовтчыліс.

Варук кыліс Мурзикаслысь зырыштчёмсё да сылы окота лои ошйысьыштны ловья чачаяснас. Босьтіс каньёс мездорас, топёдіс дінас да, кор мёдыс кутіс тракйысьны, эз лэдз, матёдіс Мурзикасё ёшинь дорас, бергёдіс юрсё, мед аддзас ёшиньсайса лэбачьяссё:

— Да видзёдлы, видзёдлы, йёюк. Аддзан, кутшём мича лэбачьяс мян пуйс вылын.

Но Мурзик эз кёсыи видзёдны, бергёдліс юрсё ётар-мёдарё, пескылясис, зіліс мездысьны, но друг быттьё измис да торгёдіс пельсё, сэсса нюжёдчис стеклёланыс да вёрзьявтёг кутіс дзоргыны ёшинь саяс: казяліс лэбачьяссё. А Варук любёпырысь шуаліс:

— Аддзан, аддзан, кутшом мичаось найо да мусаось.

А Мурзик сюся видзодіс-видзодіс да чепосйис-нетшышт-чис Варук кийсь, уйкнитіс мод жыройо, ывлао петан одзос дорас.

Аскинас Варук друг аддзис, кызди льом пу вылас гусьоник кавшасис Мурзик. Оти ув вожсянь модо вуджиг, сийо матыст-чис сеян чомлань, кон «пируйтис» некымын горд мороса жонь. Кор Мурзик прамоя нин матыстчис на доро, лэбачьяс казялісны сийос да лыйыштисны-лэбзисны мод пу выло. Мурзик сыылісо нюждомон колльодіс найос синнас да петитчомон лэччыштис, а сэсса и чеччыштис лым вылас.

Лым сылом борас батыс дугдіс лэбачьясто вердны, оз по ков велодны найос дась сеян виччысьны. Мед по асьныс кор-сьысьоны. Но Варук век жо петкодлывліс пирог тор либо нянь шором, чирыйліс повья поскыс выло.

Отчид, вердігкостіыс, Варук кытчоко ывавліс, а кор локтіс вердчанінас, лэбачьяс эз вовны, а Мурзик, мурзиг-мурчкиг, мыйко сейис, а гогорыс воли лэбач гон.

Варук гогорвоис, мый сейо каньыс, да уськодчис сы выло. Мурзик чушкысьліс-тшотьясьліс да уйкнитіс керка мышкас, сараяс каян звозланьыс.

Варук забедноысла, коньор лэбачос жалитомла, пуксис пос дорышас да борддзис.

Та борын кокасьысь лэбачьяссю отнаньисю Варук эз нин кольлы. А Ворука-Мурзика дыр на логалисны ота-мод вылас.

Варук-олыся

Бара локтіс ар. Кутіс кодздодны. Оти асыло, садьмом борас, Варук видзодліс ывлаас да нимкодпырысь городіс:

— Ой!.. Ывлаыс кутшом!.. Видзодлы, почо!.. Видзодлы, мам! Ывлаыс дзик еджыд! Лым усьома. Талун даддьон иславны поэяс.

— Иславны талун оз на артмы, — шуис пöчыс, а мамыс содтис:

— Лымйыс öд, нылук, зэв на этша.

— Тайö лымйыд, бобöанöй, регыд сылас, — пасьтасигмозыс шуис Öльöксей да шыöдчис мамыс динö. — Тэ, мам, талун горничасыд галанка пачтö ломтышты. Кöдзыд нин. Кынмыны кутлим. Гашкö, локтан войыс нöшта на кöдзыд лоас. Бур, мый вöскресеннöйö мöд пövста рамаяссö öшиньясö тэчим. Ковмис эськö войнас чеччыны да ломтысьны.

Пажнайттöдзыс Öвдя пöч Варуыскöд петалисны пeсла, а бöрас Öвдя водтöдис нывкаöс горничаас крöватьö да ломтис пачсö. Биыс кутчысис, и пöч кайис паччöрас неуна шойччыштны-вугыртлыны. Недыр куйлыштитис вoсьса синмөн, сэсся и унмовсис.

Унмовсис, а регыд и вöтасьны мöдис. Быттö томиник ныв на. Пöдругаясыскöд вöрын вотчöны. Зэв мича да гырысь öмидз вoöма. Юмов. Наберушкаяс тырисны, да мöдöдчисны гортаныс. Друг кыпитис лөк төвныр. Öвдяöс качöдис вывлань. Төвныра сынöдыс курыд тшын сорөн кутис пырны вoмас и тыясас. Лолавны эз кут вермыны, тшын кöрыс пöдтыны мöдис, кызöдны, и Öвдя садьмис.

Садьмис и пыр жö казялис: керкаыс и збыль тырöма тшынөн. Весиг ывласа югыдыс öшиньöд муртса писькöдчис. А горничасыс кылис Варуклөн кызöдöм сора бöрдöмыс. Öвдялөн юрын чардбиөн югнитис: ломтысян пачсянныс кыткö öзйис кö-а. Гашкö, пач вoмыс вoссис да джоджас öгыр усис, либö пач трубаыс потис, либö юшкасянныс... Öвдя сьölöмö быттö мыйкö сатшыкысис, сийö измылис места вылас, а юрас бара: «Варукöй кöни?» Сийö лэччис паччөр вывсьыс, кималасөн воис горнича öдзöсöдз, но тшын пиас нинöм эз тыдав, и сöмын бöрдöм шы сертиыс аддзис нывкаöс крöвать увсьыс, кыскис сийöс сэсь, да, курскигкызигсорөн, кималасөн моз жö воис посводз öдзöсöдзыс да петкöдис кильчö вылас бöрдысь-кызöдысь нылös. Сэсся кык-ö-

куимысь горша апыштіс сөстөм сынөдсө да уськөдчис бөр керкаас. Тэрмасьөмөн гурыйв восьтіс кухня өшиньсө — слабог, өти пөвста на вөлі — да бауөн кыссис горнича өшиньяс дорас. Восьталіс и найөс. Биыс некөн эз тыдав.

Кор кыз тшыныс разаліс, Өвдя кутіс корсьны тшынөдөмысь помкасө. Пач вомыс и юшкаыс пөдса, труба оз жө тшынөд. Сэк Өвдя пача-стен костсьыс казяліс некымынлаті пуркнитлысь сьөд тшын.

— Но, инасьтөм лов!.. — горөдсис Өвдялөн. — Но и олыся миян!.. Бара нин пакөститчөма... Бара нин пач боксө розьөдлөма.

Өвдялы пач бокөдыс тшыннас сьөласьөмыс пыр жө төд вылас уськөдіс, кызди коркө, важөн нин, тайө пачыскөд татшөмыс вөвлі нин. Тадзи жө арнас ломтісны да керка тырыс тшынөдліс. Вөлөмкө, джджсяныыс метра судтаын кымын пач кирпич костсьыс став сөйсө кодкө гудйөма-перйөма.

— Коді нө тадзи розьөдліс? — эз төдны сэк Өвдя да Коля верөсыс, Өльөксейлөн батыыс. Медбөрын шуисны, мый тайө олысяыс мыйыськө дөзмөма да пакөститчөма. И өні, чайтіс Өвдя, сылөн жө киподтуйыс.

Тшыныслысь трунтитөмсө дугөдны Өвдя кирпичьяс костас суйышталіс көтөдөм рузумторьяс, а рытнас висьталіс пиыслы, колө пө выльысь сөявны. Татшөмыс пө коркө вөвлі нин, да тайө, дерт, олысяыс тешитчө на вылын.

Өльөксей видзөдліс пач боксө, нюмьөвтіс аслыс, быттьө мыйкө төд вылас уськөдіс, да юаліс мамыслысь:

— А меным, мам, кымын арөс вөлі, кор воддзаясьсө, бать дырйи на, олысяыд дөзмөдчис?

— Кажитчө, ар вит ли квайт. Школаад тай эн на ветлөдлы-а...

— Көнкө, сымда жө, мыйта Варуклы?

— Збыль... Стөч сымда...

— А, гашкө, тайө абу олысялөн киподтуйыс?



— Сылөн, сылөн... — эскөдана вочавидзис Өвдя. — Некодлы сэссия...

— А ме чайта, мөдтор... Помнитан, Варуктө радио тшыкөдлөм бөрад пач пельөсас сувтөдлм?.. А сийө сэтчө и ланьтөдчөма. Дыр сэн чушъяліс. Нөшта кык-ө-куимысь казьявлі, кыдзи бара пач костас пырөма. Дырөн көйвидзис. Мый нө, мися, сэн жуйвидзан? А сийө нурбыльтіс, прөста пө сідз. Ме эг гөгөрволы, мый вөчис. А өні төда...

— Мый нө?..

— Кирпич костсьыс сөйсө гурйис да сөйис...

— Лөсьөдлы...

— Збыль-збыль... Ме өд, мамук... Кор дзоляөн вөлі, пач костаным дзесбьөмөн кирпич костсьыс сөйсө гурйылі да сөйлі жө. Да-да... Тайө ме сэк пачтө розьөдлі. Ті батькөд чайтінныд олыся пакөститчөмөн. А збыльвылас вөлі ме.

— Мыйла нө сідзсө?..

— Мыйлакө сөйыс өна коліс. Тыдалө, мыйкө эз тырмы. Тыдалө, и Варуклы кутшөмкө микроэлемент ли мый ли сөян-юансьыд оз тырмы. Со сөй дінө и босьтчылөма.

Өльөксеј корис дорас нывсө да зэв небыда юаліс, гурйыліс-ө сийө пач боксьыс сөйсө. Нывка юрсө өшөдөмөн сулаліс бать пидзөс костын да нинөм эз висьтав. Сөмын мөдысь юалөм бөрын, кор Өльөксеј шуис, нинөм пө тэкөд ог вөч, Варук довкнитіс юрнас: ме.

— Мыйла нө гудйин сөйсө?

— Сөйи.

— Чөскыд али мый?

— Мем тай чөскыд кажитчис.

Өльөксеј өлөдіс нывсө, мед водзө пач боксө эз нин гудйы.

— Со өд, со өд... — дыр на шуаліс Өвдя пөч. — А ме чайті, олыся дөзмөдчө.

Варук-мездысь

Сийö төв поводдяыс быттьö йöйталіс, дурис. Клящöй кöдзыд бöрын друг шондöдліс, сэсся лёкысь турöбаліс, кöть керкасьыд эн пет. Став туйсерсö сайöдіс-шыльöдіс. Бöрас бара шондöдліс, сэсся швачöдчывны мöдліс керка да пывсян стеньясö лёк кöдзыд. А шондöдлём бöрад да лым чир усьтöгыд кöдзыдыс дорис небзьылём лымсö кыз йиön. Гөгөр лои вильыд, вольк.

Татшөм вильыд дырйиыс Öвдя мөдөдчис юкмөс дөрө вала. Варук, весът судта чача ведроөн — сы бөрся.

А юкмөс срубсö дзоньнас дөрөма кыз йиön да труба юрыс лоөма нывкөса вольк мыльк шöрын. Вильдөмсьыс, эськө, кералыштöма жö йисö, тшупөдъяс вöчöма, но век жö вильыд.

Öвдя лэпталіс васö чепнянас, тыртіс асьыс да Варуклысь ведраяссö, велöдыштіс на внучкасö:

— Тэ, Варук, эн тэрмась, донаöй. Ньöжйöник тувччав, видзчысьöмөн, — да нель-ö-вит воськов, буретш нывкөсінсö, колльöдыштіс сійöс. Сэсся бергөдчис аслас ведраясла, босьтіс карнаннас, мөдөдчис, но нельөд воськовсö вöчигөн вильскöбтіс да и пласьткысис-усис. Ваыс вылас и солькнитчис. Пöч усигас балябöжнас кучкысис чорзьöм йиö дай нюжөдчис тушанас йи вылас, и лөнис — воштіс садьсö.

Варук повзис, шыбитіс ведраторьяссö да уськөдчис пöчыс дөрö:

— Пöчö!.. Мый тэкөд, пöчö?.. Сувт вай, чеччы!.. Чеччы нö, пöчö...

Нывка кватитіс пöчыслысь кисö, кутіс тракйыны сійöс, кысыны, зілис сувтöдны:

— Кылан, пöчö?.. Сувт но... Öвдя пöч...

Но пöчыс эз вочавидз, ни эз сувт. Сöмын, тракнитлігас, чорыдджыка ымöстліс. Варук эз öвсьы, тракйис и тракйис пöчсö

сойодыс. Сэссия босьтчыліс лэптыны юрсө, но лёталом Өвдя куйліс кӧдзыд йи вылас да эз шыась.

Варук бӧрддзис, пуксис пӧчыскӧд орччӧн да, надеясӧ дзикӧдз воштытӧг на, бӧрдӧм сорӧн чуксалис сійӧс:

— Тырмас нин куйлынытӧ, пӧчӧ... Чеччы... Гортӧ мунам. Кылан? Гортӧ пырам. Кынман ӧд тан куйлігад...

Шуис да друг чӧліс, думыштчыліс, а сэссия звирк сувтіс да котӧртіс орчча керкаӧдз, кайис кильчӧ вылас да мӧдіс торкӧдчыны. Но некод эз шыась. Сэки нывка бара бӧрддзис да котӧртіс мӧд керка дорӧ. Лимзигтырйи бара мӧдіс йиркӧдчыны да чуксасьны, и регыд посводз ӧдзӧсыс воссис да мыччысисны Варуклы тӧдса пӧч да дзор уска-тошка пӧль.

Варук тшӧкъяліг-мыкталіг висьталіс, мый лоис пӧчыскӧд. Пӧрысь суседьяс ӧдйӧ пасьтасисны да котӧрӧн сорӧн мӧдӧдчисны юкмӧс дорас.

Кызкӧ-мыйкӧ ӧтар-мӧдар боксянныс босьтӧмӧн найӧ лэптісны Өвдясӧ да кыскисны керкаӧдзыс, водтӧдісны крӧвать вылӧ. Пӧрысь сусед гозья босьтчылісны эськӧ пальӧдны Өвдяӧс, но эз вермыны. Сэк пӧрччӧдісны кӧтасьӧм паськӧмсӧ, видлалісны, кыті да ӧна-ӧ доймалӧма Өвдя, а сэссия суседкаыс котӧрӧн муніс гортас.

Варук гусьӧник век лимзис крӧвать мышкас мыджсьӧмӧн, а пӧль бурӧдіс нывкаӧс да шуаліс, молодеч пӧ. Ошкис, мый гӧгӧрвоӧма корны отсӧг вылӧ.

Бӧр воис суседка-пӧч, вайис кутшӧмкӧ зелля тыра клянича дозьяс, ӧтиысь исӧдіс Өвдяӧс, и сійӧ тракнитчис да паляліс, воис ас садяс.

Кор Өвдя пӧч вермис нин пуксьыштны крӧвать дорышас, чукӧстіс внучкасӧ, топӧдліс морӧс бердас, малалыштіс зарничкыльяс юрсӧ, оқыштіс да шуис:

— Мусаӧй тэ менам... Мездысьӧй... Атьӧ тэд... Гашкӧ, и смертьысь мездін менӧ.

Варук да Буско

Кыдзкё войнас Варук садьмис Буско понмыслён сара-яс гораа увтыштöмысь. Нывка кывзысьыштис, но Буско сэсся чöв оліс. Друг Бускоыс лёк ногөн эргыны кутіс. Стен сайсянь кыліс омöля, но Варук пыр и гөгөрвоис: сэні, ывла-сараяс, мыйкё абу лючки. Нывка повзис да котөрөн уськөдчис пыді жыръяс, көні узисны бать-мамыс:

— Пап! Садьмы!.. Бускоыд мыйкё лёк ногөн увтö.

Öльökсей пыр жö и паляліс. Садьмис и мамыс.

Карта-сарайсяньыс кыліс Бускоыслөн лёкысь эргөм-вурзалөм... Öльökсей тэрмасиг чальподйөн гынкөмасис, шкап пельöс сайсьыс кватитіс ружьесö, ыджыд пач водзас ломзьөдіс пöнар, көтшассьыс босьтіс кышөдсö да петіс посводзас. Тоня көмасис-пасьтасис жö, гартыштис юрас чышьянсö да тшöтш петіс.

Эз вермы кутчысьны и Варук. Сійö сулаліс-сулаліс, кывзысис, мый вöчсьö сараяс, а сэсся босьтіс пальтосö, павкнитіс вылас да тшöтш петіс посводзас. А сарайсяньыс кыліс нин Бусколөн нораа никсөм, сэсся кыкысь дорвыв гымыштіс ружье, медбöрын батьыс гораа ёрччыштис.

Пöнарлөн чусвидзысь би югöрын Варук аддзис, мый батьыс и мамыс звöз öдзöс дорасось. Паськыд öдзöс пöлыс вöлі восьса да бать-мамыс видзөдісны тöлысь югöра ывлаас, зілісны мыйкё аддзыны. Мамыс юаліс:

— Вєськалін?

— Öдвакö... Тэрмасьыштöма лои... Усйысис, сötанайд.

Öльökсей сувтөдіс ружьесö стен бердас, мөдіс пöдлавын öдзөссö, а Тоня муніс Буско дорас, коді никсіс-куйліс сарай пельöсас да, тыдалö, көсйис увтыштны, но кывсис сöмын ойöстөм сямашы. Варук тшöтш уськөдчис Буско дінас, кутіс малавны сійöс, чуксавны нимнас да бурөдны, а сэсся жаляд-дза бөррдзис.

— Дзирыйыс чуктөма да өдзөсыс калькалыштөма, — броткөд-чис аслыс Өльөксей. — Ад горшыд сэтчө и кужөма суйсыыны... Кодкөлун турун вайигөн өд казьявлі чуктөмсө да мудзөм вивсыыд бөрсө эг лөсьөд. Мисья, мөд вөскресенньөө. А, загрекиыд, сэтчө и вевъяліс...

Өльөксей топөдіс өдзөссө да калькалөминсө пыкис пөв помөн. Тонья босьтіс киас курччалөм Бускосө да пыртіс керкаас, водтөдіс ыджыд пачбокса паськыд лабич вылас. Варук пырис сы бөрсья, бара пондіс шыльөдны да нимсө шуаліг бурөдны Бускоөс, но мамыс вештіс сійөс да кутіс видлавны Бускоөс, корсьны, кыті курччалөма сійөс көиныс.

Пырис Өльөксей, тшөтш копыртчис пон дорас:

— Ёна и тшыгьялөма, тыдалө, ад горшыд, лысьтіс кө грездө петны да весиг сарайө суйсыыны, пон вылө ыштыны...

Видлалөм бөрас шуис:

— Прамөя коньөр Бусколы дөнзьөма. Бур, Варукным ас кадө кылөма увтөмсө, садьмөдөма мянөс. Муртса кө сөрмыштім и — джагөдіс эськө сійөс вөрсая дявөлыд.


Батьыс мыш сайсянь Варук аддзыліс, кыдзи да кыті варсийөма-чашйөма Бускосө вөрсая «госьтыс». Сэтшөм жаль лоис Бускоыс, мый мөдіс бөрдны.

— Бусконым кулас? — юаліс нывка.

— Мый тэ? Мый тэ?.. Оз жө өд кув... Йодалам доймөминсө да көрталам, регыд бурдас. Понмыдлөн пө дойясыс өдйө бурдөны, — Тонья зілис бурөдны да эскөдны нывсө. — Мун вай, вод да узьяшт нөшта.

Мамыс нуөдіс Варукөс крөвать дорас, водтөдіс, но нывка дыр на эз вермы унмовсьны. Сійө мөвпаліс Буско йылысь, гусьөник чышкаліс синсө да ас кежсьыс кутіс казьтывны, кыдзи ислаліс да ворсліс понкөд, кыдзи меліавліс-малавліс.

Буско вөлі дженьядик виж сера гөна, баля судта. Варук дзоляджык дырйиыс ёна поліс сыысь. Кор Буско матыстчыліс



нывка дорö, Варук пыр жö пондыліс чилзыны да бöрдны. Батьыс бурöдліс сійöс да матыстліс Буско дінас, но нывка пыксыйліс да бара лимзыліс.

А Буско мөдарö: сулаліс чöла, нывка вылö видзöдіс рама. Чатöра бöжнас легнитлөмөн да юрсö öтар-мөдарас пöлынтьлөмөн быттьö дивитіс нывкаöс да көсйис висътавыны: «Мыйла нö тэ меысь сэтшöма полан? Ме öд зэв рам да бур. Аддзан öд: ме сулала эргытöг да увттöг. Шы сеттöг сулала тэ водзын». Тадзи паныда сулалыштöм бöрын Буско, бöжсö забеднöйсла увлань лэдзöмөн, ньöжйöник мунліс нывка дорысь.

Но коліс кад, и нывка вочасөн кутіс велавны Буско дінö. Эз нин öтдортчы сыысь.

Кыдзкö пажнайтöм бöрас Öльöксей сетіс нылыслы яй лестукъяса ыджыд лы да шуис:

— Ноко, Варенька, сет тайöс Бусколы.

Нывка видзчысьöмөн босьтіс лысö, мөвпалыштіс да петіс ывлаас, көн Буско көлачö моз гартыштчöмөн унджык кадсö куйліс кильчö пос помас. Полігтырйи нывка матыстчис понланьыс, пуктіс лысö сысянь неылö. Буско, юрсö лапа вывсьыс лэптывтöг, видзöдыштіс нывка вылö, дышиника сувтіс, нюжмовтчис да вöлисти босьтчис вильöдны сетöмторсö. Варук матыстчис, лажынтьчыштіс да инмөдчыліс понлы кымöсас. Буско пыр жö и энөвтліс лысö да нюлыштіс нывкалысь кисö. Нывка повзис да тракнитіс кисö асланьыс. Буско дивитыштöмөн моз видзöдліс сы вылö да бара мөдіс гольскыны лынас. Недыр мысти Варук бара нюжöдіс кисö да малыштіс Бускоöс. Пон быттьö эз и кыв, некыті сылөн эз вөрзбы. Варук збоймыштіс да шылькнитіс Бускоöс юрсяньыс да бöжöдзыс. Сэсся мөдысь дай коймөдысь.

Сійö лунсянь Варук дугдіс повны нель кока горт видзысьсьыс. Найö кутісны ёртасьны. Нывка петкөдліс ёртыслы бекарын сёянтор да и ассяньыс на гусьөн моз сетліс сакар либö кампет.

А кор воис төв, батыс лосьодіс понмыслы сийос кодь колуй, доддявліс короба даддьо, да Буско ислодліс нывкаос грезд отар помсянь мододзыс. Татшом ислалом бoryн Варук ена и малавліс понсо, вашкодіс пеляс вель уна мелі кыв.

Но сийо шудтом войо тшыг коинлон «госьтитны» воломыс уськодіс и Варукос, и дзоньнас семьясо ковтом шого. Медьена шогалис, жалитіс Бускоос Варук. Лун-лун сийо бергалис муса ертыс дінын. Вердіс-юкталис, малалис да тельодчис-сёрнитіс, регыд по ставыс бурдас, и найо бара кутасны ворсны да иславны отлаын.

И збыль, Буско эз дыр нёрпав. Дойясыс бурдісны, и найо важ мозыс отлаын коллявлісны уна кад.

Варук ыждало

Батыс Варуклон окотапырысь сёрнитліс нылыскөд. Мамыслы геждджыка сюрліс кадыс нылыскөд отлаын сёрнитыштны да ворсыштны. То мос-порсьнас либо баляяснас ноксьыны коліс, то пеласьны-пожъясьны. Содтод: тшоқыда сельпо канторасьыс вайліс гортас уджсо.

Пуктас горничаса пызан вылас съод-еджыд мольяса тшоти, паськодас се бумага тыра папкаяс, пуксяс пызан саяс, бергодло, лыддьо бумагаяссө да тотшкодчо тшоти мольяснас — артасьо.

Варуклы ко гажтом лолі, дозмыліс чачаяснас ноксьыны — воліс пызан дорас, зыртчис мамыс дінын да мыйко дзайгискорис. Дерт, медводз сылы коліс мамыслон мелілуныс, сыкод ворсыштомыс да сёрнитыштомыс. Мамыс ко эз вевъяв да эз вичмод сылы неуна съолөмбур, заводитліс низгыны, ыждавны. Сэки почыслы либо батыслы ковмыліс кыскыны сийос пызан дорсьыс да мыйонко ворсодны-гаждодны.

Кор мамыс мунліс нин удж вылас, Варук босьтліс тшотісө да скөрпырысь колскис-вешталіс мольяссө то отарас, то модарас. Быттьо лөгсө косийс вештыны тшоті вылас. Сыысь, мый

рытнас мамыс ворсіс тшөтінас, а эз ськөд: вежөгтіс. Весиг гатшөдліс тшөтісө да ислөдліс-быгльөдліс джоджөдыс.

Кыдзкө өтчид нывкалы вывті нин забеднө лои, мамыс оз ворс ськөд да: бара бумагаяссө паськөдөма, тшөтінас колскөдчө да мыйкө гижө. Зыртчис-зыртчис пызан дорас, сэс-ся моль чукөрсө вештіс мөдарас, дзугис артасьөмсө. Мамыс шлөпкис сылы балябөжас да, мышкас кучкыштөмөн нуөдіс аслас пельөсө, чачаясыс дінө. Варук недыр кежлө лөньліс да дузгысьөмөн пукалыштіс ичөтик улөс вылас. А мамыслы лои ставсө выльысь артавны.

Недыр мысти Варук бөр воис пызан дінас, сувтіс мөдар дорышас, мамыслы воча. Сулаліс-сулаліс, бугжыльөн видзөдіс-видзөдіс сы вылө, сэсся босьтіс пызан помас куйлысь чукөрысь вевдорса бумагасө да шыбитіс джоджас.

Мамыс чуймис, дугдіс лыддьысьны-артасьны, чырыштіс нывсө да тшөктіс лэптыны бумагасө, пуктыны места вылас. Варук бугжыльөн, кыв шутөг, видзөдыштіс мамыс вылө, босьтіс чукөрсьыс мөд бумага да тшөтш шыбитіс сійөс. Тоня скөрмис да горөдіс:

— Пырысь-пыр лэпты бумагаяссө!.. Кодлы шуөны?.. Он кө лэпты... Ме тэнө!..

Нывка бугжылясьыштіс на мамыс вылө, сэсся пызан пельөсас куйлысь бумагаяссө дзоньнас швыркнитіс джоджас.

Тоня петіс пызан сайсьыс, кватитіс нывкасө сой пөлөдыс.

— Ак, тэ тадз!.. Ме тэнө таысь тасмаөн! Тасмаөн!.. — да кутіс швачөдны нылыслы бекъясас. — Ме тэд петкөдла, кызди менсьым бумагаяссө шыблавны! Ме тэд петкөдла, лёк, туйтөм ныв!..

Варук эз бөррдзы да скөрпырысь воча горзіс-шуаліс:

— Тэ ачыд лёк!.. Тэ ачыд туйтөм!.. Туйтөм мам! Ме тэнө ог радейт! Кучкав, колөк! Нөйт!..

— Дерт нин, он радейт, дерт, он. Радейтін кө, эн торкав менө, эн, эськө, дзуг!..

Буретш сэк ывлаысь пырис Ольөксе́й. Сійö öлөди́с гөтырсö, босьти́с Варукöс ки вылас, петкөди́с горничасы́с кухня жыръяс.

Варук дузгы́сис да водтöдзы́с сэ́ссия некодкөд э́з сёрнит, ни э́з ворс. Кайи́с паччöрас, пöчы́с динö, да сэтчö и унмовсис.

Аскинас Варук садьмис водза-водз, но аслас вольпасы́ннин. Бать-мамы́с да пöчы́с узисны на. Нывка локти́с горнича пызан дорас, көни́ куйли́сны мамы́слөн папкаясы́с, недыр видзöды́шти́с на вылö, гусьöник, быттö ко́дкө вермис аддзыны, осьти́с öти па́пка, кы́скис бума́га да шы́битис джоджас. Недыр мөвпалы́штöм бöрын кы́скис мөдöс, коймөдöс, а сэ́ссия дугды́втöг кы́скали́с и шы́блали́с, кы́скали́с и шы́блали́с. Кор медводдза па́пкаы́с ты́ртöммис, кути́с пуркө́шитны мөдöс. Кы́скали́с и шы́блали́с, кы́скали́с и шы́блали́с. Сэтчöдз, кы́тчöдз па́пкаы́с э́з ты́ртöммы. А сэ́ссия и па́пкаяссö шы́ркнитис. Джоджы́с вольсасис, ты́рис бума́гаясна́с да веси́г ки пы́дöс пасьта ку́шин э́з ты́дав.

Кор Öвдя садьмис да видзöдли́с горничаас, шай-пайму́нис:

— Господьöй-енмöй!.. Мый нö тайö?.. Коди́ тадзисö?.. — сэ́ссия аддзис пач дорсы́с джоджас дузгöдчöмөн пукалы́сь Варукöс да гөгöрвоис, ко́длөн тайö уджы́с:

— Варенька, мый нö тэ тайö вöчöмыд?.. Ок-ок-ок...

Гозья́лөн узы́лан жы́р öдзöссö осьты́штöмөн Öвдя чу́скали́с:

— Тоня... Чеччы, Тоня! Видзöдлы, мый нылы́д вöчöма...

Тоня петис горничаас да синмы́с сы́лөн паська́лис. Сійö уськө́дчис джоджас, кватитис не́кымын бума́га, видзöдли́с найöс да лизгы́ртчис, пуксис джоджас, ы́джы́д гөлө́сөн бөрддзис.

Петис и Ольөксе́й, видзöдли́с гөгöрбок, сьöкы́да ышловзис да копы́ртчис гөты́рыс дорö, öлөди́с бөрдöмсы́ыс, Варуккөд пö чу́көрта́м ставсö да öтла́ын лөсьö́дам, кы́дз вöли́. Сэ́ссия локти́с нылы́с дорö, куткы́ртчис сы́ водзö да лө́ня, миритчана юали́с:

— Но, кы́дз?.. Öни́ сьöлöмы́д бурмис?.. Мый чө́в олан?

— Час, ме сы́лы петкө́дла! — горө́ди́с Тоня да уськө́дчис нылы́с вылö, но Ольөксе́й кути́с сійöс:

— Дугды вай!.. Эн нин вөрөд сійөс...

Тоня нөшта на ёнджыка бөрддзис да петіс горничасьыс.

— Но и калабродитөмыд тэ, нылө... — Ёльөксей бара куткыртчис нылыс дінө. — Мыйла нө тэ тадзисө?.. Мамтө өд татшөмторсьыд удж вывсьыс вөтласны. Аддзан, кызди сійө бөрдө?.. Вай чукөртам ставсө да тэчам пызан вылас, кызди колө. Кужин пакөститчыны, куж и бөр лөсьөдны, — Ёльөксей босьтчис чукөртны бумагаяссө да тэчны пызан вылас.

— Но, мый сэн дуввидзан? — нөшта на шыөдчис Варук дінө батыс. — Вай чукөрт, чукөрт.

Варук дыр на эз вөрзбы места вывсьыс. Сөмын сэк, кор этша нин колис, сійө ньөжйөникөн кутіс лэпавны бумагаяссө да тэчны пызан вылас. Кор ставсө лои чукөртөма, батя-ныла веськөдчисны да видзөдлісны өта-мөд вылас, сэссия Ёльөксей босьтис Варукөс киас, пуксис улөс вылө да юалис:

— Но, висьтав, мыйла тэ мамтө тадзи дзерөдан?

— А мыйла сійө удж вывсьыс кутшөмкө бумагаяс вайө? Ме ворсыштны сыкөд көсйи, а сійө кутшөмкө бумагаяс вылын зунгырасьө.

— Сідзкө, сідз колө. Удж вылас абу вевъялөма, а вөчны колөма өдйөджык. Оз кө гортө вай эштөднысө, удж вывсьыс кутас воны сёр. Гашкө, тэнад унмовсьтөдз оз и во. А асывнас, гашкө, и тэнад садьмытөдз мунас. Некор нин тадз эн вөч. Ме, чайта да, тарыт мамтө он и аддзыв. Вой шөрөдзыс удж вылас вошласяс. Гөгөрвоан?

Нывка копыртыштліс юрсө.

— Водзө тадзи эн нин вөч... Он өд?

— Ог, — муртса кывмөн нурбыльтіс мыжа Варук.

Варуклөн нывъёрт

Ичөтик грездад и олысьыс этша. Торъя нин Варуккөд тшөтшъякодъ ныв-зонкайд.

Вөлі эськө буретш Варук арлыда жö нывка, но найö эз артмыны. Нывкаыс жалитіс чачаяссö, эз лэдз Варукöс ворсны наөн. Варук дözмис да эз мөд ёртасыны сыкөд. Весиг пöчсö эз лэдз на ордö ветлыны...

Варукъяссиянь қык керка сайын оліс нывкаысь ар кыкөн ыджыдджык Опоня нима детинка, но асьсö зэв ылө да ыджыдö пуктіс, ышнясис. Эз көсийи ёртасыны «силльö-мылльöыдкөд».

Вөлі грездас нöшта некымын детинка да нывка, тöдчымөн ыджыдджыкөсь Варукусь, и найö быттö эз казавны ичöt нылös. Та понда сылы некодкөд вөлі, пöчсьыс кындзи, ёртасыны да ворсны. Но...

Кызкө Варук ворсіс чачаяснас керка водзас, сяльгис-сёрнитіс Ляля аканьыскөд, байкөдіс сійös и, кор аканьыс быттö унмовсис, водтөдіс лыаысь вöчөм «крöватяс». Сэссия мөд аканьсö, Валясö, көсийис варовитөдыштны да водтөдны, но сöмын вевъяліс босьтны киас, кызди мыш сайсьыс кыліс:

— Ляляыд оз узь да...

Варук бергөдчис. Сы водзын сулаліс төдтөм нывка, Варукусь неуна ыджыдджык. Арösөн ли, гашкө и, кыкөн.

— Узьö... — паныд шуис Варук. — Ме сійös зэв бура байкөді да унмовсис.

— А тэ бурджыка видзөдлы. Синъяс ылас. Найö öд восьсаöсь.

— Но и мый?

— Сідзкө, сійö оз узь.

— Сійö менам и восьса синнас узьлө.

— Восьса синнад оз узьлыны.

— Ёна тай тэ төдан... Эн торкав менö...

— Аддзёмьд тай аканьясөс. Тэ найөс байкөдан-унмовсьөдан, а найө синсө оз и куньлыны. Вот менам эм акань!.. Байкөдан да водтөдан кө, синсө пыр и куньө.

— Эн пөрьясь.

— Войт ог пөрьясь.

— Сідзкө, мыччөдлы сійөс. Видзөдла, кутшөм сійө синсө куньысь аканьыс.

— Сійө менам абу тан, а гортын... Карын...

— Мыччөдлынытө нинөм да пыр жө и лосьөдін, карын пө...

— Сө збыль! Гортын, карын. Колөк, ветлам миянө, юалам мамлысь.

— Ёна тай. Мамьд, эм көть абу аканьыд, дерт нин, тэ ног шуас.

— Эм!.. Сө збыль — эм!

— Пөрьяшка, — шуис Варук да кутіс чукөртны чачаяссө.

— Тэ мый?.. Он нин сэсся ворс?.. А кытчө мунан?

— Гортө пыра.

— Эн на мун... Вай өтлаын ворсам.

— Пөрьяшкаяскөд ме ог ворс.

— Он кө эскы, оз и ков. Мед тэ ног лоас. Сөмын эн мун. Отлаын кутам ворсны. Ладнө?

Варук чукөртіс чачаяссө моздорас да мөдөдчис дзирьяланьыс.

— Абу өмөй тэд гажтөм өтнадлы ворсны?.. Тэнө кыдзи шуөны?

Варук сувтовкерис дзирья водзас, но эз вочавидз.

— Нимьд, мися, тэнад кыз?

— А тэнад? — воча юалис Варук.

— Менө Машукөн шуөны... Маша, Мария, мөд ног кө.

— А менө Варукөн да Варенькаөн чуксавлөны.

— Со и төдмасим, Варя... Миян классын эм жө өти Варук. Варяөн пыр шуам. А тыр нимыс пө — Варвара. Вай эн скөрав... Отлаын кутам ворсны.

— А пөръясьнытö он нин кут?

— Тэ акань йывсьыд?.. Да мед тэ ног лоас. Лыдды, мый ме сідз, шмонитöм могысь шуи. Бур?

— Сідзкө, бур. Ворсам.

Нывкаяс бурасисны да мөдісны өтлаын гажөдчыны-ворсны. Но Маша быттьö мыйкө дзевис ас пиас... Син пыдöсас мудеритан би киньяс югнитлісны...

Колис лун нель. Витөднас водз асыв öшинювсяныыс Маша чукөстіс Варукөс. Варук пыр жö и петіс. Маша кисö мышкас сайөдөмөн вашъяліс-нюмъяліс:

— Төдмав: мый ме кыин кута?

— Шыдөса пöсь шаньга.

— Эн төд.

— Сідзкө, преник либö кампет.

— Бара эн төд.

— Сідзкө, ме ог төд...

— Сетчан?

— Сетча.

Маша чургөдіс кисö водзас, а сэні — мича платтьöа ыджыд-кодь акань. Лөз синнас видзөдіс веськыда Варук вылө.

— Мича абу аканьыс?

— Ой, кутшöм мича!.. Вайлы мем... Кутыштла...

— Энлы... Аддзан: синмыс восьса?

— Восьса.

— А öні ме сійöс байкөдышта и водтöда...

Маша байкөдыштіс, сэсся пөрөдіс аканьсö мыш вылас, быттьö водтөдіс, и синмыс сылөн куньсис.

Варук шемöсмөмөн видзөдіс аканьлөн куньса син вылө.

— Аддзан?

— Аддза... Кытысь тэд татшöмыс?

— Карса магазинын вузалöмаöсь. Ме сійөн уна и ворслі.

А коркөя вензьöм бöрад пöчö гортö вои да мамöс тшöкті звөнитлыны батылы, мед аканьсö вайис. Тöрыт бать локтіс да вайис сійöс.

— Вайлы мем... Ме тшөтш ворсышта...

Варук босьтис синсö куньлысь аканьсö да мөдiс мелiа сывны сылы, сэсся неуна öввöалис да ньöжйöникöн водтöдiс мыш вылас. Синмыс аканьлөн куньсис.

Водзö Варука-Маша зэв ёна лöсялисны да лун-лун ворсiсны öтлаын.

Опоня тешитчö

Маша велöдiс Варукöс бергöдлан көв — скакалка — вомён чеччавны. Варуклөн некыдзи эз артмы, кык-ö-куимысь дзугсьытöг чеччыштны оз вермы. Но Варук зiлис. Маша тшöктiс көвсö дженьдöдыштны, мед эз люзьяв муöдыс. И мөдiс артыны. Но Маша мындаысь торксывтöг чеччыштны Варук эз вермы. Мудзлiс.

Öтчид на дорö матыстчис Варуклы мустём Опоня да виччысьтöг яра горöдiс:

— Руки вверх! — да веськөдiс на вылö пу револьвер.

Нывкаяс чур-чермунисны да джёмдылисны. А кор повзъыштöмыс бырис, Маша керыштiс воча:

— Тэд кө колö, тэ и лэпты. А миянлы некор.

— Лэптöй, мися, китö!.. Ме тiянöс пленö босьта. Ме öд тöда: тi фашистскöй разведчик-диверсантъяс.

— Ачид тэ фашист, — ярскöба вочавидзис Варук, а сэсся бергöдчис Машалань да гусьöник юалис сылысь: — А кодi сийö — диверсантыс?

— Лёк вöчысь морт.

— А ноко, вай мем эсийö шнурсö, — шуис Опоня.

— Тайö абу шнур, а скакалка, — вочавидзис Маша.

— Со кыздз... Скакалкаөн шуанныд, а збыль вылас тайö бикфордовöй шнур. Дасьтысянныд взорвитны миянлысь танкөвöй заводнымöс. Но ме тiянöс эрдöдi и кутi. Лэптöй, мися, китö и вайöй мем шнуртö.

— Ачылд тэ диверсант! Мун татысь!.. Эн торкав миянös. Аддзан, ме чеччавны велöдча.

— Аддзöмыд мыйö велöдчыны. Вай бурджык войнаысь ворсам. Ме лоа сöветскöй разведчикöн, чекистöн, а тi — фашистскöй диверсантъясөн.

— Ми диверсантъяснад ог кöсийö лоны. Колöкö, ачылд и диверсантав. Мунам, Варук.

Нывкаяс мунисны Машаяс öшинюлö, а Опоня, синкым увтiыс видзöдiг, колльöдiс синнас нывкаясös. Зумыш чужöм сертиыс тöдчис: мыйкö мөвпалö.

Аскинас сёйыштöм бöрас Варук пыр жö и мөдöдчис Маша дiнö. Дзиръяöдыс петiгөн на аддзис, мый Опоня сулалö аслас керка потшös дорас да мыйкö мошкоритчö-вöчö. Варук збоя мөдöдчис Машаяслань, но воис зонка весьтöдз да син улас усис ордым шöрас куйлысь мича кыша кампет.

«Со öд, кодкö кампетсö уськөдöма, — югнитiс Варук юрын. — Колö босьтны. Оз аддзы да кодкö тальыштас».

Варук видзöдлiс зонкалань. Мöдыс бергöдчыштöма да кытчöкö бокö видзöдö. Нывка копыртчис да кöсийис босьтны кампетсö, но кыис кватитiс кушинсö. Кампетыс чунь увсьыс быттьö исковтiс бокö. Варук выльысь нюжöдчис кампетысла, а сийö бара пышйис. «Мый нö тайö?» — мөвпыштiс нывка да нöшта öтчыд ыштылiс босьтны кампетсö, но сийö «пышйис»...

Потшös дорсянныс кылис Опонялөн гажа серам. Тешитчана серам. Варук видзöдлiс детинка вылö:

— Тэ мый сералан?

— Серам петö, сийөн и серала... — вочавидзис Опоня да тешитчана моз жö юалис: — Мый нö сэсь, му вывсьыс, куралан-кокалан?

— Ме нинöм ог курав... — шöйöвошис Варук.

— Кыдзи он? Ме öд абу синтöм. Мыйкö му вывсьыс босьтан и босьтан, а кыид век куш.



Нывкалөн синмыс бара усьліс кампет вылас, и öні аддзис: сы дорö нюзöдöма еджыд сунис. Веж турун вылас бура тыдаліс. Нывка юрын югнитіс: «Со мый вöлöма... Мустöм Опоняыд сунис кöрталöма... Кор кампетсö босьтны кöсьи, сійö кыскыштіс сунисöдыс».

Тайö здукö нылös чукöстіс Маша:

– Варя! Мый нö сэн сулалан? Лок татчö!..

– Сулала тай со, – вочавидзис нывка, кыйкнитліс Опоня вылö да тэрыба тувччис сунис вылас. Зонка кватитчис да тракнитіс, сунисыс ори, а кампетыс коли Варук тупли дорö.

Здук мысти Маша вöлі Варук дорын нин:

– Мый нö тальыштін?

– Эсійö лёк позйыс ыштöма тэа-меа вылын тешитчыны.

– Кыдзи? Мыйла чайтан?

– Тэ дінö локтігөн казялі мича кыша кампет.

– Но и мый?.. Öтнад и сёйин?

– Эг... Ме кöсьи сöмын босьтны сійös, а кампетыс ки улысь пышйис.

– Кыдзи нö кампетыс пышйыны вермас? Абу öд кока...

– Эсійö мустöм Опоняыс, вöлöмкö, сунис кöрталöма, и, кор ме кöсьылі босьтны кампетсö, кыскыштö суниссö да кампетыс пышйö менам ки улысь.

– Со мый...

– Тэ кор чукöстін менö, Опоняыс видзöдліс тэ вылö. Ме сэк кості тувччи сунис вылас. Мустöмыд, эськö, и тракнитіс жö суниссö, да сёрмис нин: кампетыс со менам тупли дорö коли.

– Кöсьис, сідзкö, дэльöдыштны да дзерöдны миянös, – шуис Маша, босьтіс кампетсö Варук тупли дорысь да чургöдіс Опоньяль: – Шедіс кампетыд...

Но зонкалөн чужöмыс войт эз вежсьы. А Маша разис кышсö да пыр жö шыбитіс сійös кысьыс. Кампет кышыскöд öттшöтш му вылас усис да быгыльтчыштіс куим-ö-нель сьöд ёкмыль.

— Мыйла нө шыбитін сійӧс? — чуймыштіс Варук да копырт-чис ёкмьясысла, но Маша горӧдіс:

— Эн босът!

Потшӧс дорсянь кыліс серам. Нывкаяс видзӧдлісны: Опоня куснясьӧмӧн ваксис.

— Но мый?.. Чӧсмасинныд?.. Юмов-ӧ кампетыс?

— Йӧй тэ!.. Тэнад чужӧмыд эсійӧ кӧкыль кодъыс жӧ мустӧм, — вочавидзис Маша да нуӧдіс Варукӧс ас ордас.

А зонка нӧшта неуна сералыштіс, сэсса сьӧкыда ышловзис да жугыль синнас кытшовтіс грездса тыртӧм уличсӧ. Сійӧ эз тӧд, кытчӧ воштысьны гажтӧмысла.

Выль ворсӧм

А Варука-Машаӧс гажтӧмыд эз босътлы. Лун-лун чача-аканьӧн ворсісны, либӧ Бускоыскӧд котралісны, чипан-сильӧсӧ вердісны. Ыштылісны и сыркіӧн да гораньӧн ворсны, да кыкӧ-ныдлы эз вӧв сэтшӧм гажа.

Мукӧддырйи налӧн ворсӧм-гажӧдчӧмыс быттьӧ орліс: матыстчыліс Опоня. Нывкаяс джӧмдылісны да, мустӧмпырысь видзӧдлӧм бӧрын, мунлісны сы дінысь мӧдлаӧ.

Регыд мысти нывкаяслӧн котырыс содіс: Варукъяскӧд орча керкаса олӧма гозъя ордӧ отпуск кежлас воисны пиыс да монъыс, а накӧд и кык нывка — Лена да Даша. Нывкаяс пыр жӧ и тӧдмасисны, да гажыс налӧн ёна содіс: нельӧннад ӧд лӧсяланаджык ворсны. Лун-мӧд кежлӧ нывкаяс быттьӧ ышмылісны да весиг сійӧмсӧ вунӧдлісны. Пӧчьясыслы дыр-кодъӧн лолі чуксавны, мед пыравласны нуръясьыштны.

Ӧти асыв, кор Варук пырис суседъяс посводзӧ, ӧдзӧс сайсяньыс на кыліс Леналысь гораа нюжйӧдлӧмӧн шуалӧм:

— Ты-ы... А-а... Ны-ы... Я-а-а... Лоӧ... Лоӧ...

— Но, мый лоӧ? — кылӧ, юаліс Даша.

— Та-а...ня-а... Таня!.. — нимкодъпырысь кост мысти горӧдіс Лена.

Варук восьтіс өдзөссө, воськовтіс порог вомоныс да пыр жө юалис:

— Мый нө ті вочанныд?

— Школаөн ворсам, — вочавидзис Даша.

— Школаөн?

— Да. Ме быттьө велөдысь, а Лена — велөдчысь. Ми ськөд шыпасьяс велөдам, мед лыддысьны да гижны сійө кужис.

— Мем өд таво арнас школаө колө мунны, — содтіс Лена.

— А тэ, Варенька, таво мунан жө школаад? — юалис Даша.

— Ме ог төд...

— Тэд нө кымын арөс?

— Квайт нин... Пөчө шуө, Рөштво дырйи пө сизим тырас.

— Сідзкө, тэд водз на школаад мунны. Тэ пукалышт да кывзышт. Ме нөшта неуна велөдышта, а сэсся петам ывлаө да сэн ворсам.

Даша тшөктіс чойсө водзө лыддыны, а Варук пукаліс да зэв сюся кывзис и видзөдіс. Но регыд прөстатө, нем вөчан моз пукалөмсьыд Варук дөзмис да шыасис:

— Ме тшөтш көсья школанад ворсны. Ме тшөтш көсья шыпасьястө велөдны.

— Збыльысь?

— Збыльысь...

— Сідзкө, ме тэд кута петкөдлыны да висьтавыны, кутшөм шыпас кызди шусьө. А тэ бура видзөд да төд вылад босьт.

Даша листыштис книгасыс кымынкө лист бөрвыв да мед-воддзасыс индіс ыджыдөн төдчөдөм «А» шыпас вылө да шуис:

— Со тайө шыпасыс лоө «А-а-а»... Ноко, висьтав мем, кутшөм тайө шыпас?

— А-а-а...

— А өні ачыд сійөс гиж... Со тэныд бумага да карандаш.

Рытнас Варук терпенньөсьыс петмөн виччысис бать-мамсө. И кор мамыс муртса воис дзирья дорас, Варук кильчө дорсяньыс котөртис сылы паныд:

— Мам!.. Ми Дашакөд да Ленакөд талун школаөн ворсім! Ме куим шыпас нин төда. «А», «Мы» да «Шы». Лыддя и гижны нин кужа.

— Ай да жө нин тэ! Ай да, муса ныв!.. — Тоня лэптіс нывсө ки вылас да окаліс. — Сідзкө, вай мыччөдлы... Ошйысь...

Варук вайис аслас пельөсысь бумага да карандаш и гижис «Мама» да «Маша» кывъяс. Тоня малыштис нывсө юрөдыс, нөшта окыштис да нимкодпырысь шуис:

— Ворсөй школанад, донукъяс, ворсөй... Сійө зэв буртор, школаыд...

Опонякөд бурасьём

Мөд луннас Варук радпырысь асыводз котөртис виль пөдругаяс дінас. Ворсісны школаөн сьөлөмыс бурмытөдзыс, а сэсса ывласяньыс найөс чукөстис Маша, да найө петісны ывлаө, көні дзирдаліс яр шонді.

Медводз ыштісны гораньөн ворсны. Пудъясисны да кутасян пудыс усис Варуклы. Даша көрталіс Варуклысь синсө чышъянөн, ас гөгөрыс бергөдлыштис, шуаліс:

— Тупкөм синма Варук нима, он тэ аддзы өні нинөм. Ас гөгөрыд бергөдлам, сэсса кутасыны тшөктам.

Кисө шевгөдөмөн Варук кывзисис, кылө-ө көнкө кодлөнкө лов шыыс либө кок шыыс, да сэтчань и мөдөдчыліс, а Даша, Лена да Маша котралісны сы гөгөр, муртса инмөдчыштлісны либө кучкыштлісны, зэв матысянь горөдыштлісны «ку-ру» либө «ку-ку» да өдйө бөрынтьчылісны-пышйылісны. Быд ногыс зілісны ызьөдны нывкаөс.

Дыркодь Варук ветлөдліс шевгөдөм киөн, но некодөс эз вермы кутны. Буретш сэки на дорө матыстчис Опоня да потшөс дорас нөриньтчөмөн видзөдіс, кызди нывкаяс ызъялөны, ворсөны-гажөдчөны. Видзөдіс да вом дорсө курчаліс.

Варук эськө зэв өдйө уськөдчыліс вильыш ызыйдысьяс бөрся, но найө пелька пескыльтчылісны, эз сетчыны Варук ки улө. Сэсся Дашалы, тыдалө, жаль лоис Варукуыс да төдөмөн сетчис кутны.

Кутасьны мөдіс Даша. Нывкаяс сідз жө пелька пышъялісны и сыысь, но друг Опоня петіс улич шөрас, сувтіс веськыда Даша мышкө да вөсни гөлөсөн чилөстіс «ку-ру», но местасьыс эз вөрзьи, эз пышйы. Даша пыр жө и шамыртіс сійөс, нимкодпырысь шуис:

— А-а, сюрин... — но кор разис чышъянсө да аддзис, кодөс кутіс, юаліс: — Тэ мый? Мыйла?..

— Көсья тіянкөд ворсны.

Варук пыр жө и матыстчис на дорө да ярскөба шуис:

— Оз ков сійөс босьтны ворснытө...

— Мыйла? — юаліс Даша.

— Сійө омөлик морт. Зэв ёна ышнясьө да дзерөдчө.

— Ме сэсся ог нин кут, — көсйысис Опоня.

— Пөръясян, — суйсис сёрниө и Маша.

— Сө збыль: ог кут...

— Варенька... Машук... — нывкаяс да зонкаыс вылө видзөдыштөм бөрын шуис Даша. — Гашкө, сійө и збыль сэсся оз кут ышнясьны. Сылы өтнаслы гажтөм. Мед ворсас мянкөд.

— Ме ськөд ворсны ог кут, — косьөбтіс Варук да чепөсйис бокө.

— Öвсьы, Варук. Зонкаыс тай шуис нин, мый водзө оз кут ышнясьны да ыкпашитны.

— А мед ейбогуасяс.

— Да-да, мед честнөй кыв сетас, — содтыштіс Маша.

— Тэ кылан, мый нывкаясыс шуөны? — юаліс Даша Опонялысь. И Опоня жуглясьөмөн вочавидзис:

— Збыль. Ме сэсся ог нин кут дөзмөдчыны да ыкпашитны. Ей бог! Лэдзанныд кө котырад, сэсся ог нин кут. Честнөй кыв.

Варук букушөн видзөдліс зонка, сэсся Даша вылө да нурбыльтіс:

— Но, инось... Мед ворсас... Оз кө кут...

— Ог, ог нин кут, — тэрмасьомён содтіс Опомя.

— Но, сідзкө, өні буретш тэд кутасыны, — шуис Даша.

Көрталісны синсө Опомялысь, бергөдлісны ас гөгөрыс да мөдісны водзө ворсны. Нывкаяс быд ногыс ызейөдісны детинкаос. Торъя яра тувкнитліс сылы Варук, и зонка сьөлөмсяныыс зілис, тэрыба бергөдчыліс, мед чапкыны-кутны тувкнитысьсө, но нывка пелька чепөсйыліс да пышйыліс сы дінысь.

Варук «налькйын»

III өттөдзыс горанясьом бөрын челядь өзйисны ворсны дзебсясьомён. Уличын этшалаө позис дзебсьыны да шуисны пырны Даша-Ленаяс йөрө, көні позис сайөдчыны и пу-куст, и амбар-жытник, и пес чипас сайө.

Медводз корсьысьны пуд уси Машалы. Кильчө мыш да керка стенислысь пельөссө шуисны «галөөн», сувтөдісны Машаос пельөслань чужөмөн да тшөктісны лыддыны кызьөдз. Мукөдыс сэк кості мед вермисны дзебсьыны.

Варук ыштыліс суйсьыны пес чипас костас, но син улас друг уси жытниклөн восьса өдзөсыс. Нывка котөртіс сэтчө, видзөдліс пытшкас, пемыдас, да воськовтіс порог вомөныс, сувтіс стен дорас, өдзөс куричыскөд орччөн. Югыд шондіа ывла бөрад пемыдас сійө дзик нинөм эз аддзы. Здук-мөд-коймөд мысти ывласянь кыліс Машалөн гора шуөм:

— Ме мөді корсьны.

Варук мөвпыштіс, мый курич дорсьыд Маша сійөс регыд и аддзас. Суйлас юрсө жытникас и казялас. «Бурджык өдзөс саяс саймовтчыны», — да кутіс кытшовтны веськыда чургөдчөм өдзөс пөвсө, и друг!.. Кокыс эз тувччы джоджө, а дзумгысис кутшөмкө тыртөминө, нывка ойкнитыштіс да пласьткысис чорыд гырысь йи торьяс вылө. Тайө вөлі амбарыслөн көзөд гуыс. Пласьткысис-усис да чорыда кучкысьомсьыс пыр жө воштіс садьсө.

Ленаос да Дашаос Маша одйо аддзис да «галюалис», а Опоняос дыр лои корсьны. Кор Маша прамюя ылыстчис «галю» пельюссъыс, вирич вылысь звиркнитис-чеччыштіс Опоня да «галюасис» Машаысь водздзык, и сійон мездіс водзындзык аддзюм Ленаа-Дашаос.

Лои Машалы вылысь зунгысьны «галю» пельюсö да бара лыддыны кызьодз. Мездюмаяс да Опоня вылысь дзебсисны.

Модысьтö Маша одйо аддзис да «галюалис» ставнысö, Варукос кындзи. Дыр лои корсьны сійос. Быд саймовтчанін, öшинов пасьтасъыс и весиг сайсьыс кытшовтіс-видзöдаліс Маша, но Варукос некысь эз аддзы. Весиг и көзöда амбар öдзöсас суюліс юрсö да дыркодь видзöдіс пемыдсьыс. Сöмын эз ышты пыравны да öдзöс саяс видзöдлыны... Сэки эськө...

Ставон пондісны корсьны, кытчö сэтшöма сяммöма дзебсьыны Варукыс. Корсисны-корсисны, но эз аддзыны, и Опоня шуис:

– Сійö, көнкö, гортас нин муніс.

Маша пыр жö вомаліс сійос:

– Ланьт. Эн сөр нинөмсö. Сійö абу сэтшөм, мед мудеритны да ылөдчыны. Тайö ми омöля корсям.

И сэки, кытыськө быттьö зэв ылысь, кыліс чукöстчөм. Даша шуис:

– Ноко, чөвлöй, эн сёрнитöй...

Ставон чөв усисны, лов шысö кутөмөн кутісны кывзысьны. И пыр жö пельөдзныс воис негора, ылысь-ылысь чукöстчөм:

– Отсалöй!.. Нывкаяс!.. Даша!.. Код сэн эм? Отсалöй!..

Чуксасьöмыс вöлі бөрдөм сора. Явö кывсис жытникладорсянь. Öтчукөрөн сылань и котөртісны. Даша суюис юрсö öдзöсас, но нинөм пемыдсьыс эз аддзы, а кытыськө улысь, быттьö гуысь, кыліс Варуклысь лимзөм сора чуксасьöмсö да гораа юаліс:

– Варук, тэ көн?

— Ме тан, — пыр жö кыліс вочакыв. — Ме уси кутшöмкö гуö. Тані кöдзыд йи... Ме кынма... Ог вермы петны...

— Час, ме пöчöс чукöста, — шуис Даша да котöртіс гортас, но пыр жö воис бөр. — Пöчö кытчöкö мунöма. А бать-мам мунісны вотчыны. Колö аслыным мездыны...

Опоня пырис пытшкас да, пидзöсчанясьöмөн, кималаснас кутіс корсьны кöзöд гу дорсö. Гуыс вöлі öдзöс пöv помсяныыс весът кымын сайын. Опоня чургöдіс юрсö гу весътас да юалис:

— Тэ аддзан менö, Варя?

— Аддза.

— Ме киöс тэлань нюжöда, а тэ кутчысь, видла лэптыны тэнö.

Варук вильсьялöмсорөн сувтіс тірзьысь кок вылас, кутчысис Опоня киö. Опоня выныштчис, мед лэптыны нывкасö, но выныс эзджык тырмы. Чукöстіс Машаöс:

— Маша, лок отсав! Босьт мöd кисö. Но, кутін?

— Куті.

— Ме горöда: кыскам, и выныштчы лэптыны.

— Но. Горöd.

— Öтик... Кык... Лэптам!..

«Спасательяс» выныштчисны да лэптисны Варукöс коскöдзыс, но водзö эз вермыны. Опоня шуис Машалы:

— Ме öні гатшөн вода. Варуклөн тушаыс менам кок вылын лоö. Тэ коксö сылысь гусьыс кыскы.

Сідзи и вöчисны. Кор Варукöс лои лэптöма нин, воис пöнара Даша. Сійö пыр жö сетіс пöнарсö Машалы, а ачыс отсалис сувтны Варуклы кок йылас. Опонякöд сойбордйöдыс кутыштöмөн нуödісны сійöс гортас. А пöчыс сійö лунö эз вöv гортас: Дашаа-Лена пöль-пöчкöд мунісны вөрö, видзöдлыны, кисьмöма абу чöd-öмидз, петöма абу тшак.

Челядь водтöдісны Варукöс паччöрас, шебрöдісны ватаа кыз эшкынөн, пузьöдісны самöвар нывкаöс пöсь чайөн юктöдны.



Нöшта кык лун нывка висьöдчис, куйлис гортас. Коймöд луннас кöсийс петны ывлаö, но Öвдя пöчыс эз лэдз сийöс. Сэк нывка юалис:

— А мыйла сэни, жытникас, вöчöмаось гу да сэни тырыс йи? Кытысь сийö? Ме тай со уси да висьми... Кутшöм бур сыысь?

— Эм сыысь бурыс, эм... Жытникас йи тыра гуыс кöзöдөн шусьö. Сэни коми йöзид видзöны öдийö тшыксьысь сёянсö. Чери да яй, йöv да вый и мукöдтор. Кыйсьысьдылы мойвиас кö да ваяс уна чери ли пötка, ставсö öд кык-куим луннад он сёй, а шоньднад кыйдöсыд вермас дуксьыны... Сы понда и жытникас вöчöны гу, кытчö тöвнас вайöны ю вылысь йи...

— Мыйла нö жытник öдзöссö абу пöдлалöмаось?

— Дашаа-Ленайдлөн Паладь пöчыс восьсөн кольöма жытниксö тölöдны. Тэ прöстит сийöс, эз нарошнö, эз тöдöмөн сідзи вöч. Паладьыс öд воліс тэнö видлыны да фельдшер вотöдз на вайліс лекарство. Он öд лöгав сы вылö? Эн лöгав...

— Ог...

Ыджыд кöсийм

ЖЖ ар гожöм шöрын прöстудитчöм Варук висьöдчис вель дыр. Пöдругаясыс пыравлісны гажöдыштны сийöс. А кор Варуклы лои лöсьыдджык, Даша воывліс нин книгаөн да лыддьывліс дженьыдик висьтьяс да мойдъяс. Тайö нöшта на ёнджыка ышöдіс Варукöс велöдны шыпасъяс, мед и ачыс нин вермис лыддьысьнысö.

Гожöмлы воис пом. Грездын гöсьтитысь Варуклөн карса пöдругаяс мунісны бөр караныс. Мöдісны ветлыны школаö и грездса гырысьджык зонкаяс да нывкаяс, тшötш и Опоня. Варуклы лои гажтöм... И öтчид сийö шуис бать-мамыслы:

— Ме тшötш кöсья ветлöдлыны школаö.

— Варенька... Тэ öд дзоля на, водз на тэд школаад, — шуис мамыс.

— Абу!.. Абу нин дзоля! И ме кужышта нин лыддысьны. Ачылд төдан.

— Зэв бур, мый тэ кужыштан нин лыддысьны. Да арлыдыд тэнад оз тырмы.

— Кыдз оз тырмы? Меным сизимөд арөс нин.

— Сійө и эм, мый сизимөд на, а абу сизим нин. Сэтчө босьтөны найөс, кодлы сизимыс тыри нин. А кодлөн абу, найө пө оз кутны велавны.

— А ме кута велавны. Кута! Ме со кужа нин...

Код төдас, дыр-ө, эськө, вензисны зня-ныла, эз кө скойсы сёрниас батьыс:

— Тырмас тиянлы вензыны. Тоня, аски босьт сійөс сьөрсыйд, нуөдлы школаас да сёрнит сэні. Гашкө, босьтасны. Оз кө, тэ дінын сельпо кантораад өти лунтө коллялас.

Сідзи и вөчисны. Сөмын рытнас Тоня-Варука локтісны гортас могмытөг. Нөшта кык лун Варук оліс гортас, корсис сьөлөм гажсө пөчыс дінын, Бускоыскөд да чачаяснас ворсігөн, но нинөмөн эз вермы бурасьны. Коймөд асывнас нывка выльысь шыөдчис школаө мунөм йылысь. Шыөдчис батьыс дінө.

Өльөксея ыштыліс жө өлөдны нывсө, но Варук нинөм эз көсйы кывзыны. Сійө бөрддзис да мөдіс ыждавны. Муніс аслас пельөсө да став чачасө шыблаліс, водіс джоджас да мөдіс авзөмөн горзыны-бөрдны. Некутшөм буръялөм бать-мамыс-лысь эз кывзы.

Гозья дөзмисны нылыслөн ыждалөмысь да мөдөдчисны удж выланис. Кор Варук казяліс, мый бать-мамыс пасьтасьөны да дасьтысьөны мунны, звирк сувтіс да, горзөмөн бөрдіг, вөтчис на бөрся кильчө вылөдзис. Кымын ылө мунісны бать-мамыс, сымын ёнджыка горзіс-бөрдіс Варук. Сэк Ольөксеялөн ёкмуні-дрөгнитіс сьөлөмыс и улич шөрсяныыс бергөдчис.

— Тырмас горзынытө. Пасьтась. Ме нуөдла тэнө школаас.

Дыр лои Ольөксеялы сёрнитны школаса директорыскөд и медводдза классын велөдыськөд. Некудз эз көсйыны босьтны

Варукӧс школаас. Аддзисны уна помка. Медводз, дерт, арлыдыс оз тырмы. А ичӧт да, оз на велав. Содтӧд: Расдорсяньыд пӧ школаӧдз вель ылын, и нывкаыс кутас мудзны. А медсясӧ ыстысисны сы вылӧ, мый нывкасӧ руыс венас да сійӧ дугдас школаас волыны. Артмас «отсев». А «отсевсыд» найӧс пызйӧны-видӧны. И роносянь, и министерствосянь. Тайӧ пӧ медся лӧкыс.

Ӧльӧксейлӧн быри надеяыс да шуис нылыслы:

— Мунам гортӧ. Тайӧ бюрократ-буквоедъястӧ, тыдалӧ, он эскӧд.

Нывка нетшыштӧс кисӧ бать кисыыс, тӧрӧдӧс директора-велӧдысь дӧнас да сьӧлӧмсяньыс, зэв эскӧдана шуис:

— Тьӧтӧ, босьтанныд кӧ школаад, ме велӧдчӧмсыд ог дугды. Ме бура кута велӧдчыны. Сӧ збыль!

Директора-велӧдысь видзӧдлӧсны ӧта-мӧд вылас чуймыштӧмӧн.

— Сэсся кӧсья юавны: кутшӧм-сэтшӧм отсевысь тӧ поланыд? Сійӧ нӧ кӧинысь и ошкысь на лӧкджык да повзӧдчысь?

Директор, тыдалӧ, кӧть и чорзыштӧм сьӧлӧма морт нин, но нюмъӧвтӧс да пондӧс буръявны да эскӧдны Варукӧс. Висьталӧс, мед мӧд во локтас. Сэк сійӧс радпырысь босьтасны медводдзаӧн, пуксьӧдасны медбур да медьюгыд местаас.

Друг Ӧльӧксеилы юрас воис мудеритана, но зэв шогмана мӧвп, да выльысь шыӧдчис директорыс дӧнӧ. Сьӧлӧмсяньыс, эскӧдана:

— Ёна кӧ нин поланныд отсевысь, вӧчам тадз: журналад тӧ Варукӧс эн и гижӧй. Сӧмын босьтӧй школаад, мед велӧдчас мукӧд моз жӧ. Некутшӧм кокньӧд сеттӧг юасьӧй, мый колӧ. А ме став сямӧс пукта, мед эз дугды ветлӧдлыны урок вылад. И велосипед ли мотоциклет ньӧба сійӧс школаӧ новлӧдлыны.

Кабинетас пуксьыліс чөвлун, а сэсса директорыс шуис:

— Сөмын тадзи кө — поэяс. Лэдзам волывны. Мед пукалас и велөдчас. Но журналын да мукөд документын сылөн ним-ов оз ло. А дугдас кө велөдчынысө, мыжанас асьныд лоанныд. Нöшта төдöй да видзчысьöй: таво кө дугдас велөдчөмсьыс, сійö и локтан воö сідз жö вермас дугөдчыны. Пөвадитчас.

Та вылын и сёрнитчисны. Варукөс примитісны школаас, пыр жö нуөдісны классас. Но велөдчан во джынсö журналас сійöс эз и пасйыны, көть юасисны мукөдөс моз жö. А Варук зілис, сэтшöма велөдчис, мый төвся каникул бöрас сійöс гижисны нин журналас.

Бөркыв пыдди

Велөдчис Варук бура да во помасьöм бöрас сылы сетісны зэв мича, зарни шыпасъясөн гижöм «Похвальнöй грамота». Сэтшöм жö «Похвальнöй грамотаяс» сылы козьнавлісны и мөд, и коймөд, и мукөд класс помалөм бöрын. А школасö помалөм бöрын сылы сетісны «Зарни медаль».

Юриндалысь

Варуклön семья	3
Варук сөвмө-быдмө	4
Варук да радио	6
Ловъя чачаяс	10
Варук да Мурзик	13
Варук-олыся	14
Варук-мездысь	19
Варук да Буско	21
Варук ыждадö	25
Варуклön нывьёрт	29
Опоня тешитчö	32
Выль ворсöм	36
Опонякöд бурасьöм	38
Варук «налькйын»	40
Ыджыд кöсийöм	44
Бörкыв пыдди	47

Для детей младшего школьного возраста

ГОРЧАКОВ Гений Дмитриевич

ВАРУК ИЗ ДЕРЕВНИ РАСДОР

Повесть
На коми языке


Художник А.В.Мошев

*Редактор П.И.Симпелев. Художественный редактор В.Б.Осипов
Корректор Л.Н.Хатанзейская. Компьютерная верстка — З.А.Поздеева*

Подписано в печать 17.10.2006. Формат 60×84¹/₁₆. Гарнитура «Коми TextBook». Печать офсетная. Усл. печ. л. 2,79. Уч.-изд. л. 2,3. Тираж 500 экз. Заказ №13195

Коми книжное издательство
167982, г. Сыктывкар, ул. Карла Маркса, 229

Отпечатано в ОАО «Коми республиканская типография»
167982, г. Сыктывкар, ул. Первомайская, 70



КОМИ
НЕБӖГ
ЛЭДЗАНІН
2006

